



文選卷第二十二

梁昭明太子蕭統撰

詩

招隱詩二首

五言

左太冲

杖策招隱士荒塗橫古今巖穴無結構丘中有
鳴琴白雲停陰岡葩曜陽林石泉漱瓊瑤織
鱗或浮沉非必絲與竹山水有清音何事待嘯
歌灌木自悲吟秋菊兼糗糧幽蘭間重襟躊躇
足力煩聊欲投吾簪○經始東山廬果下自成榛

前有寒泉井聊可瑩心神
悄悄青葱間竹栢得其真
弱葉棲霜雪飛榮流餘津
爵服無常玩好惡有屈伸
結綬生纏牽彈冠去埃塵
惠連非吾屈首陽非吾仁
相與觀所尚逍遙撰良辰

招隱詩 五言

陸士衡

明發心不夷振衣聊躑躅
躑躅欲安之幽人在浚谷
朝采南澗藻夕息西山足
輕條象雲構密葉成翠幄
激楚佇蘭林回芳薄秀木
山溜何泠泠飛泉激鳴玉
哀音附靈波頽響赴曾曲
至樂

非有假安事澆淳樸富貴苟難圖
稅駕從所欲

反招隱詩 五言

王康琚

小隱隱陵藪大隱隱朝市
伯夷竄首陽老聃伏柱史
昔在太平時亦有巢居子
今雖盛明世能無中林士
放神青雲外絕迹窮山裏
鷓鴣先晨鳴哀風迎夜起
凝霜凋朱顏寒泉傷玉趾
周才信衆人偏智任諸已
推分得天和矯性失至理
歸來安所期與物齊終始

遊覽

芙蓉池作

五言

魏文帝

乘輦夜行遊逍遙步西園雙渠相漑灌嘉木繞
通川卑枝拂羽蓋修條摩蒼天驚風扶輪轂飛
鳥翔我前丹霞夾明月華星出雲間上天垂光
采五色一何鮮壽命非松喬誰能得神仙遨遊
快心意保已終百年

南州栢公九井作

五言

殷仲文

四運雖鱗次理化各有準獨有清秋日能使高
興盡景氣多明遠風物自凄緊爽籟驚幽律哀

壑叩虛牝歲寒無旱秀浮榮其夙隕何以標貞
脆薄言寄松茵括匠感蕭晨肅此塵外軫廣筵
散泛愛逸爵紆勝引伊余樂好仁惑祛吝亦泯
猥首阿衡朝將貽匈奴

游西池

五言

謝叔源

悟彼蟋蟀唱信此勞者歌有來豈不疾良遊常
蹉跎逍遙越城肆願言屢經過廻阡被陵闕高
臺眺飛霞惠風蕩繁囿白雲屯曾阿景昊鳴禽
集水木湛清華褰裳順蘭沚徙倚引芳柯美人

行歲月遲暮獨如何無爲牽所思南榮戒其多
泛湖歸出樓中說月 五言 謝真運
日落泛澄瀛星羅游輕橈憇謝面曲汜臨流對
迴潮輟策共駢筵並坐相招要哀鴻鳴沙渚悲
後響山椒亭亭映江月瀏瀏出谷颺斐斐氣幕
岫泫泫露盈條近矚祛幽蘊遠視盪誼器悟言
不知罷從夕至清朝

從游京口北固應詔

五言

謝靈運

玉璽戒誠信黃屋示崇高事爲名教用道以神

理超昔聞汾水游今見塵外鏢鳴笳發春渚稅
鑿登山椒張組眺倒景列筵矚歸潮遠巖映蘭
薄白日麗江臯原隰美綠柳墟囿散紅桃呈心
美陽澤萬象咸光昭顧已枉維繫撫志慙場苗
工拙各所宜終以及林巢曾是縈舊想覽物奏
長謠

晚出西射堂

謝靈運

步出西城門遙望城西岑連障疊巘嶠青翠杳
深沈曉霜楓葉丹夕曛嵐氣陰節往感不淺感

來念已深羈雌戀舊侶迷鳥懷故林含情尚勞
愛如何離賞心撫鏡華緇鬢攬帶緩促衿安排
徒空言幽獨賴鳴琴

登池上樓 五言

謝靈運

潜虬媚幽姿飛鴻響遠音薄霄愧雲浮棲川作
淵沈進德智所拙退耕力不任徇祿反窮海卧
痾對空林衾枕昧節候褰開暫窺臨傾耳聆波
瀾舉目眺嶇嶽初景革緒風新陽改故陰池塘
生春草園柳變鳴禽祁祁傷豳歌萋萋感楚吟

索居易永久離羣難處心持操豈獨古無悶微
在今

游南亭 五言

謝靈運

時竟夕澄霽雲歸日西馳密林含餘清遠峯隱
半規夕晦昏墊苦旅館眺郊岐澤蘭漸被徑芙
蓉始發池未厭青春好已觀朱明移感感感物
歎星星白髮垂藥餌情所止衰疾忽在斯逝將
候秋水息景偃舊崖我志誰與亮賞心惟良知

游赤石進帆海 五言

謝靈運

首夏猶清和芳草亦未歇水宿淹晨暮陰霞屢
興沒周覽倦瀛壖況乃凌窮髮川后時安流天
吳靜不發揚帆采石華挂席拾海月溟漲無端
倪虛舟有超越仲連輕齊組子牟眷魏關矜名
道不足適已物可忽請附任公言終然謝天伐

石壁精舍還湖中

五言

謝靈運

昏旦變氣候山水含清暉清暉能娛人游子澹
忘歸出谷日尚早入舟陽已微林壑歛暝色雲
霞收夕霏芰荷迭映蔚蒲稗相因依披拂趨南

徑愉悅偃東扉慮澹物自輕意愜理無違寄言
攝生客試用此道推

登石門最高頂

五言

謝靈運

晨策尋絕壁夕息在山棲疏峯抗高館對嶺臨
迴谿長林羅戶庭積石雍基階連巖覺路塞密
竹使徑迷來人忘新術去子惑故蹊活活夕流
駛噉噉夜猿啼沈冥豈別理守道自不攜心契
九秋幹目翫三春莢居常以待終處順故安排
惜無同懷客共登青雲梯

於南山往北山經湖中瞻眺

謝靈運

朝旦發陽崖景落憇陰峯舍舟眺迥渚停策倚
茂松側徑既窈窕環洲亦玲瓏俛視喬木杪仰
聆大壑淙石橫水分流林密蹊絕蹤解作竟何
感升長皆丰容初篁筍綠擇新蒲含紫茸海鷗
戲春岸天鷄弄和風撫化心無厭覽物眷彌重
不惜去人遠但恨莫與同孤遊非情歎賞廢理
誰通

從斤竹澗越嶺溪行

五言

謝靈運

後鳴誠知曙谷幽光未顯巖下雲方合花上露
猶泫透迤傍隈隩迢遞陟陁峴過澗既厲急登
棧亦陵緬川渚屢逕復乘流翫迴轉蘋萍泛沈
深菰蒲冒清淺企石挹飛泉攀林摘葉卷想見
山阿人薜蘿若在眼握蘭勒徒結折麻心莫展
情用賞爲美事昧竟誰辨觀此遺物慮一悟得
所遣

應詔觀北湖田收

五言

顏延年

周御窮轍跡夏載歷山川蓄軫豈明懋善游皆
聖仙帝暉膺順動清蹕巡廣廡樓觀眺豐穎金
駕映松山飛奔互流綴緹縠代廻環神行埒浮
景爭光溢中天開冬眷徂物殘悴盈化先陽陸
團精氣陰谷曳寒煙攢素旣森藹積翠亦葱芊
息響報嘉歲通急戒無年温渥浹輿隸和惠屬
後筵觀風久有作陳詩愧未妍疲弱謝凌遽取
累非繹牽

車駕幸京口侍游蒜山作

五言

顏延年

元天高北列日觀臨東溟入河起陽峽踐華因
削成巖險去漢宇襟衛徙吳京流池自化造山
關固神營園縣極方望邑社揔地靈宅道炳星
緯誕曜應辰明睿思纏故里巡駕市舊垆陟峯
騰輦路尋雲抗瑤臺春江壯風濤蘭野茂萸英
宣遊弘下濟窮遠疑聖情岳濱有和會祥習在
卜征周南悲昔老留滯感遺萌空食疲廊肆反
稅事巖耕

車駕幸京口三月三日侍遊曲阿後湖作

五言

顏延年

虞風載帝符夏諺頌王遊春方動宸駕望幸傾
五州山祗踣嶠踏水若驚滄流神御出瑤軫天
儀降藻舟萬軸胤行衛千翼泛飛浮彫雲麗琰
蓋祥飈被綵旂江南進荆豔河激獻趙謳金練
照海浦笳鼓震溟州藐眇靚青崖衍漾觀綠疇
民靈騫都野鱗翰聳淵丘德禮旣普洽川岳徧
懷柔

行樂至城東橋

五言

鮑明遠

鷄鳴關吏起伐鼓早通晨嚴車臨迴陌延瞰歷
城闈蔓草緣高隅修楊夾廣津迅風首旦發平
路塞飛塵擾擾遊宦子營營市井人懷金近從
利撫劔遠辭親爭先萬里途各事百年身開芳
及稚節含彩吝驚春尊賢未照灼孤賤長隱淪
容華坐消歇端爲誰苦辛

遊東田

五言

謝玄暉

戚戚苦無悰攜手共行樂尋雲陟累榭隨山望

菌閣遠樹暖阡阡生煙紛漠漠魚戲新荷動鳥
散餘花落不對芳春酒還望青山郭

從冠軍建平王登廬山香鑪峯

五言

江文通

廣成愛神鼎淮南好丹經此山具鸞鶴往來盡
仙靈瑤草正翕赭玉樹信蒼青絳氣下縈薄白
雲上杳冥中坐瞰蜿虹俛伏視流星不尋遐怪
極則知耳目驚日落長沙渚曾陰萬里生藉蘭
素多意臨風默含情方學松栢隱羞逐市井名

幸承光誦未伏思託後旌

鍾山詩應西陽王教

五言

沈休文

靈山紀地德險峭資岳靈終南表秦觀少室邇
王城翠鳳翔淮海衿帶繞神垵北阜何其峻林
薄杳葱青

其一

發地多奇嶺干雲非一狀合杳

共隱天參差互相望鬱律構丹巘峻嶒起青嶂

勢隨九疑高氣與三山壯

其二

即事旣多美臨

眺殊復竒南瞻儲胥觀西望昆明池山中咸可
悅賞逐四時移春光發隴首秋風生桂枝

其三

多值息心侶結架山之足八解鳴澗流四禪隱
巖曲窈冥終不見蕭條無可欲所願從之遊寸
心於此足其四君王挺逸趣羽旆臨崇基白雲
隨玉趾青霞雜桂旗淹留訪五藥顧步佇三芝
於焉仰鑣駕歲暮以爲期其五

宿東園

五言

沈休文

陳王闕雞道安仁采樵路東郊豈異昔聊可閑
余步野徑旣盤紆荒阡亦交互槿籬踈復密荆
扉新且故樹預鳴風飈草根積雪露驚麀去不

息征鳥時相顧茅棟嘯愁鳴乎岡走寒兔夕陰
帶曾阜長煙引輕素飛光忽我道豈止歲云暮
若蒙西山藥頽齡儻能度

游沈道士館

五言

沈休文

秦皇御宇宙漢帝恢武功懽娛人事盡情性猶
未克銳意三山上託慕九霄中旣表祈年觀復
立望仙宮寧爲心好道直由意無窮曰余知止
足是願不須豐遇可淹留處便欲息微躬山嶂
遠重疊竹樹近蒙籠開衿濯寒水解帶臨清風

所累非外物爲念在玄空朋來握石髓宿至駕
輕鴻都令人徑絕唯使雲路通一舉陵倒景無
事適華嵩寄言賞心客歲暮爾來同

古意酬到長史旣登琅邪城

徐敬業

甘泉警烽候上谷抵樓蘭此江稱豁險茲山復
鬱盤表裏窮形勝襟帶盡巖巒修篁壯下屬危
樓峻上干登陴起遐望迴首見長安金溝朝灞
漣甬道入鴛鸞鮮車駑華轂汗馬躍銀鞍少年

負壯氣耿介立衝冠懷紀燕山石思開函谷丸
豈如霸上戲羞取路傍觀寄言封侯者數竒良
可歎

音釋

登池上樓

嗽音

登石門最高頂

駛音

登琅琊城

涯音

文選卷第二十三

梁昭明太子

蕭統撰

詠懷

詠懷詩十七首

阮嗣宗

夜中不能寐起坐彈鳴琴薄帷鑒明月清風吹
我衿孤鴻號外野翔鳥鳴北林徘徊將何見憂
思獨傷心

二妃游江濱逍遙順風翔交甫懷環珮婉孌有
芬芳倚靡情歡愛千載不相忘傾城迷下蔡容

好結中腸感激生憂思萱草樹蘭房膏沐爲誰
施其雨怨朝陽如何金石交一旦更離傷
嘉樹下成蹊東園桃與李秋風吹飛藿零落從
此始繁華有憔悴堂上生荆杞驅馬舍之去去
上西山趾一身不自保何況戀妻子凝霜被野
草歲暮亦云已

昔日繁華子安陵與龍陽天天桃李花灼灼有
輝光悅澤若九春磬折似秋霜流盼發姿媚言
笑吐芬芳攜手等歡愛宿昔同衣裳願爲雙飛

鳥比翼共翱翔丹青著明誓永世不相忘

天馬出西北由來從東道春秋非有託富貴焉
常保清露被臯蘭凝霜霑野草朝爲媚少年夕
暮成醜老自非王子晉誰能常美好

登高臨四野北望青山阿松柏翳岡岑飛鳥鳴
相過感慨懷辛酸怨毒常苦多李公悲東門蘇
子狹三河求仁自得仁豈復歎咨嗟

聞秋兆涼氣蟋蟀鳴牀帷感物懷殷憂悄悄令
心悲多言焉所告繁辭將訴誰微風吹羅袂明

月耀清暉晨鷄鳴高樹命駕起旋歸

平生少年時輕薄好絃歌西游咸陽中趙李相
經過娛樂未終極白日忽蹉跎驅馬復來歸反
顧望三河黃金百鎰盡資用常苦多北臨太行
道失路將如何

昔聞東陵瓜近在青門外連畛距阡陌子母相
鉤帶五色曜朝日嘉賓四面會膏火自煎熬多
財為患害布衣可終身寵祿豈足賴

步出上東門北望首陽山下有采薇士上有嘉
樹林良辰在何許凝霜霑衣襟寒風振山岡玄
雲起重陰鳴鴈飛南征鷓鴣發哀音素質由商
聲悽愴傷我心

昔年十四五志尚好書詩被褐懷珠玉顏閔相
與期開軒臨四野登高有所思丘墓蔽山岡萬
代同一時千秋萬歲後榮名安所之乃悟羨門
子噉噉今日嗤

徘徊蓬池上還顧望太梁
綠水揚洪波曠野莽茫茫走獸交橫馳飛鳥相
隨翔是時鶉火中日月正相望朔風厲嚴寒陰

氣下微霜羈旅無疇匹俛仰懷哀傷小人計其
功君子道其常豈惜終憔悴詠言著斯章
炎暑惟茲夏三旬將欲移芳樹垂綠葉清雲自
透迤四時更代謝日月遞差馳徘徊空堂上切
怛莫我知願覩卒歡好不見悲別離

灼灼西頰日餘光照我衣迴風吹四壁寒鳥相
因依周周尚銜羽蛩蛩亦念飢如何當路子磬
折忘所歸豈爲夸譽名憔悴使心悲寧與鷺雀
翔不隨黃鵠飛黃鵠游四海中路將安歸

獨坐空堂上誰可與歡者出門臨求路不見行
車馬登高望九州悠悠分曠野孤鳥西北飛離
獸東南下日暮思親友晤言用自寫
北里多奇舞濮上有微音輕薄閑游子俯仰乍
浮沉捷徑從狹路僂俛趣荒淫焉見王子喬乘
雲翔鄧林獨有延年術可以慰我心

湛湛長江水上有楓樹林皋蘭被徑路青驪逝
駸駸遠望令人悲春氣感我心三楚多秀士朝
雲進荒淫朱華振芬芳高蔡相追尋一爲黃雀

哀涕下誰能禁

秋懷詩

謝惠連

平生無志意少小嬰憂患如何乘苦心矧復值
秋晏皎皎天月明奕奕河宿爛蕭瑟含風蟬寥
啖度雲鴈寒商動清閨孤燈暖幽慢耿介繁慮
積展轉長宵半夷險難預謀倚伏昧前筭雖好
相如達不同長卿慢頗悅鄭生偃無取白衣宦
未知古人心且從性所翫賓至可命觴朋來當
梁翰高臺驟登踐清淺時陵亂頽魄不在圓傾

義無兩旦金石終消毀丹青斲彫煥各勉玄髮
歡無貽白首歎因歌遂成賦聊用布親串

臨終詩

歐陽堅

伯陽適西戎孔子欲居蠻苟懷四方志所在可
游盤况乃遭屯蹇顛沛遇災患古人達機兆策
馬游近關咨余冲且暗抱責守微官潛圖密已
構成此禍福端恢恢六合間四海一何寬天網
布絃網投足不獲安松柏隆冬悴然後知歲寒
不涉太行險誰知斯路難真偽因事顯人情難

豫觀窮達有定分慷慨復何歎上負慈母恩痛
酷摧心肝下顧所憐女惻惻心中酸二子弃若
遺念皆邁凶殘不惜一身死惟此如循環執紙
五情塞揮筆涕洟瀾

哀傷

幽憤詩

嵇叔夜

嗟余薄祜少遭不造哀榮靡識越在襁褓母兄
鞠育有慈無威恃愛肆姐不訓不師爰及冠帶
憑寵自放抗心希古任其所尚託好老莊賤物

貴身志在守樸養素全貞曰余不敏好善聞人
子玉之敗屢增惟塵大人含弘藏垢懷耻民之
多僻政不由己惟此楠心顯明藏否感悟思愆
怛若創痛欲寡其過謗議沸騰性不傷物頻致
怨憎昔慙柳惠今愧孫登內負宿心外惡良朋
仰慕嚴鄭樂道閑居與世無營神氣晏如咨予
不淑嬰累多虞匪降自天寔由頑踈理蔽患結
卒致囹圄對荅鄙訊繫此幽阻實耻訟寃時不
我與雖曰義直神辱志沮澡身滄浪豈云能補

嗷嗷鳴鴈奮翼北游順時而動得意忘憂嗟我
憤歎曾莫能儔事與願違邁茲淹留窮達有命
亦又何求古人有言善莫近名奉時恭默咎悔
不生萬石周慎安親保榮世務紛紜祇攪予情
安樂必戒乃終利貞煌煌靈芝一年三秀予獨
何為有志不就懲難思復心焉內疚庶勗將來
無馨無臭采薇山阿散髮巖岫未嘯長吟願性
養壽

七哀詩

曹子建

明月照高樓流光正徘徊上有愁思婦悲歎有
餘哀借問歎者誰言是宓子妻君行踰十年孤
妾常獨棲君若清路塵妾若濁水泥浮沉各異
勢會合何時諧願為西南風長逝入君懷君懷
良不開賤妾當何依

七哀詩二首

王仲宣

西京亂無象豺虎方遘患復棄中國去遠身適
荆蠻親戚對我悲朋友相追攀出門無所見白
骨蔽平原路有飢婦人抱子棄草間顧聞號泣

聲揮涕獨不還未知身死處何能兩相完驅馬
棄之去不忍聽此言南登霸陵岸迴首望長安
悟彼下泉喟然傷心肝

荆蠻非我鄉何爲久滯淫方舟溯大江日暮愁
我心山岡有餘暎巖阿增重陰狐狸馳赴穴飛
鳥翔故林流波激清響猿猴臨岸吟迅風拂裳
袂白露霑衣襟獨夜不能寐攝衣起撫琴絲桐
感人情爲我發悲音羈旅無終極憂思壯難任

七哀二首

張孟陽

北芒何壘壘高陵有四五借問誰家墳皆云漢
世主恭文遙相望原陵鬱膺膺季世喪亂起賊
盜如豺虎毀壤過一杯便房啓幽戶珠柙離玉
體珍寶見剽虜園寢化爲墟周墉無遺堵蒙龍
荆棘生蹊徑登童豎狐兔窟其中蕪穢不復掃
頽隴並墾發萌蘗營農圃昔爲萬乘君今爲丘
山土感彼雍門言悽愴哀往古

秋風吐商氣蕭瑟掃前林陽鳥收和響寒蟬無
餘音白露中夜結木落柯條森朱光馳北陸浮

景忽西沉顧望無所見唯覩松栢陰肅肅高桐
枝翩翩栖孤禽仰聽離鴻鳴俯聞蜻蛉吟哀人
易感傷觸物增悲心丘隴日已遠纏絲彌思深
憂來令髮白誰云愁可任徘徊向長風淚下霑
衣襟

悼亡詩三首

潘安仁

荏苒冬春謝寒暑忽流易之子歸窮泉重壤未
幽隔私懷誰克從淹留亦何益僂俛恭朝命迴
心反初役望慮思其人入室想所歷幃屏無髣

髴翰墨有餘跡流芳未及歇遺挂猶在壁悵恍
如或存周遑忡驚惕如彼翰林鳥雙栖一朝隻
如彼游川魚比日中路析春風綠隙來晨雷承
簷滴寢息何時忘沉憂日盈積庶幾有時衰莊
缶猶可繫

皎皎窓中月照我室南端清商應秋至溽暑隨
節闌凜凜涼風升始覺夏衾單豈日無重纊誰
與同歲寒歲寒無與同朗月何朧朧展轉眄枕
席長簟竟牀空牀空委清塵室虛來悲風獨無

李氏靈髣髴覩爾容撫衿長歎息不覺涕霑留
露曾安能已悲懷從中起寢興日存形遺音猶
在耳上慙東門吳下愧蒙莊子賦詩欲言志此
志難具紀命也可奈何長戚自令鄙

曜靈運天機四節代遷逝淒淒朝露凝烈烈夕
風厲奈何悼淑儷儀容永潛翳念此如昨日誰
知已卒歲改服從朝政衷心寄私制茵幘張故
房朔望臨爾祭祭爾詎幾時朔望忽復盡衾裳
一毀撤千載不復引壘壘基月周戚戚彌相愍

悲懷感物來泣涕應情墮駕言陟東阜望墳思
紆軫徘徊墟墓間欲去復不忍徘徊不忍去徒
倚步踟躕落葉委埏側枯芟帶墳隅孤魂獨燒
燄安知靈與無投心遵朝命揮涕強就車誰謂
帝宮遠路極悲有餘

廬陵王墓下作

謝靈運

曉月發雲陽落日次朱方含悽泛廣川灑淚眺
連岡眷言懷君子沉痛結中腸道消結憤懣運
開申悲涼神期恒若存德音初不忘徂謝易永

久松栢森已行延州協心許楚老惜蘭房解劍
竟何及撫墳從自傷平生疑若人通蔽互相妨
理感深情慟定非識所將脆促良可哀天枉特
兼常一隨往化滅安用空名揚舉聲泣已灑長
歎不成章

拜陵廟作

顏延年

周德恭明祀漢道尊光靈哀敬隆祖廟崇樹加
園筮逮事休命始投迹階王庭陪廁廻大顧朝
讌流聖情早服身義重晚達生戒輕否來王澤

竭泰往人悔形勅躬慙積素復與昌運并恩合
非漸漬榮會再逢迎夙御嚴清制朝駕守禁城
束紳入西寢伏軫出東垆衣冠終冥漢陵邑轉
葱青松風遵踞急山烟冒龍生皇心憑容物民
思被歌聲萬幾載絃吹千歲託旒旌未殊帝世
遠已同淪化萌幼壯困孤介末暮謝幽貞發軌
喪夷易歸軫憤崎傾

同謝諮議銅爵臺詩

謝玄暉

總帷飄井幹罇酒若平生鬱鬱西陵樹詎聞歌

吹聲芳襟染淚迹
嬋媛空復情
玉座猶寂寞
况迺妾身輕

出郡傳舍吳范僕射

任彦昇

平生禮數絕
式瞻在國禎
一朝萬化盡
猶我故人情
待時屬興運
王佐俟民英
結歡三十載
生死交情攜
手遁衰壑
接景事休明
運阻衡言革
時泰玉階平
濬冲得茂彦
夫子值狂生
伊人有涇渭
非余揚濁清
將垂不忍別
欲以遣離情
不忍一辰意
千齡萬恨生

其一 已矣平生事 詠

歌盈篋笥兼復相
朝謔常與虛舟值
何時見范侯
還叙平生意

其二

與子別幾辰
經塗不盈旬

弗都朱顏改
徒想平生人
寧知安歌日
非君撤瑟晨
已矣余何歎
輟春哀國均

贈荅上

贈蔡子篤詩

王仲宣

翼翼飛鸞載飛載東
我有云徂言戾舊邦
舫舟翩翩以泝大江
蘇矣荒塗時行靡通
慨我懷慕君子所同
悠悠世路亂離多阻
濟岱江行邈焉

異處風流雲散一別如兩人生實難願其弗與
瞻望遐路允企伊佇烈烈冬日蕭蕭淒風潛鱗
在淵歸鴈載軒苟非鴻鵬孰能飛翻雖則追慕
予思罔宣瞻望東路慘愴增歎率彼江流爰逝
靡期君子信誓不遷于時及子同寮生死固之
何以贈行言授斯詩中心孔悼涕淚漣沍嗟爾
君子如何忽思

贈士孫文始

王仲宣

天降喪亂靡國不夷我暨我友自彼京師宗守

盪失越用遁遠遷于荆楚在漳之湄在漳之湄
亦克宴處和通篋墳比德車輔既度禮義卒獲
笑語庶茲永日無讐厥緒雖曰無讐時不我已
同心離事乃有逝止橫此大江淹彼南汜我思
弗及載坐載起惟彼南汜君子居之悠悠我心
薄言慕之人亦有言靡喆不思矧伊嬖婉胡不
悽而晨風夕逝託與之期瞻仰王室慨其永歎
良人在外誰佐天官四國方阻俾爾歸藩爾之
歸藩作式下國無曰蠻裔不虔汝德憤爾所主

率由嘉則龍雖勿用志亦靡忒悠悠澹漕鬱彼
唐林雖則同域邈其迥深白駒遠志古人所箴
允矣君子不遐厥心既往既來無密爾音

贈文叔良

王仲宣

翩翩者鴻率彼江濱君子于征爰聘西鄰臨此
洪渚伊思梁岷爾行孔邈如何勿勤君子敬始
慎爾所主謀言必賢錯說申輔延陵有作喬盼
是與先民遺跡來世之矩旣慎爾主亦迪知幾
探情以華覩著知微視明聽聰靡事不惟董褐

荷名胡寧不師衆不可蓋無尚我言梧宮致辯
齊楚構患成功有要在衆思歡人之多忌掩之
實難瞻彼黑水滔滔其流江漢有卷允來厥休
二邦若否職汝之由緬彼行人鮮克弗留尚執
君子異于他仇人誰不勤無厚我愛惟詩作贈
敢詠在冊

贈五官中郎將四首

劉公幹

昔我從元后整駕至南鄉過彼豐沛都與君共
翱翔四節相推斥季冬風且涼衆賓會廣座明

鐙燿炎光清歌製妙聲萬舞在中堂金壘含其
醴羽觴行無方長夜忘歸來聊且爲大康四牡
向路馳歡悅誠未央
余嬰沉痼疾竄身清漳濱自夏涉玄冬彌曠十
餘旬常恐游岱宗不復見故人所親一何篤步
趾慰我身清談同日夕情眇叙憂勤便復爲別
辭游車歸西隣素葉隨風起廣路揚埃塵逝者
如流水哀此遂離分追問何時會要我以陽春
望慕結不解貽爾新詩文勉哉脩令德北面自

寵珍

秋日多悲懷感慨以長歎終夜不遑寐叙意於
濡翰明鐙曜閨中清風淒已寒白露塗前庭應
門重其關四節相推斥歲月忽欲殫壯士遠出
征戎事將獨難涕泣灑衣裳能不懷所歎
涼風吹沙礫霜氣何皚皚明月照緹幕華燈散
炎輝賦詩連篇章極夜不知歸君侯多壯思文
雅縱橫飛小臣信頑魯僂安能追

贈徐幹

劉公幹

誰謂相去遠隔此西掖垣拘限清切禁中情無
由宣思子沉心曲長歎不能言起坐失次第一
日三四遷步出北寺門遙望西苑園細柳夾道
生方塘含清涼輕葉隨風轉飛鳥何翻翻垂人
易感動涕下與衿連仰視日光曠曠高且懸
兼燭八紘內物類無頗偏我獨抱深感不得與
比焉

贈從弟三首

劉公幹

汎汎東流水磷磷水中石蘋藻生其涯華葉紛

擾溺采之薦宗廟可以羞嘉客豈無園中葵懿
此出深澤

亭亭山上松琴瑟谷中風風聲一何盛松枝一
何勁冰霜正慘悽終歲常端正豈不羅凝寒松
栢有本性

鳳皇集南嶽徘徊孤竹根於心有不厭奮翅凌
紫氛豈不常勤苦羞與黃雀羣何時當來儀將
須聖明君

音釋

鶖音啼鳩音火痾音于惡音女宕音客溯音泝隸音隸梵音梵侃音侃愆音愆

體音來五

文選卷第二十三終

文選卷第二十四

梁昭明太子蕭統撰

贈答二

贈徐幹

曹子建

驚風飄白日忽然歸西山
圓景光未滿眾星粲
以繁志士營世業小人亦不閑
聊且夜行游游彼雙闕間
文昌鬱雲興迎風高中天
春鳩鳴飛棟流焱激櫺
軒顧念蓬室士貧賤誠足憐
薇藿弗克虛皮褐猶不全
忼慨有悲心興文自成篇

寶棄怨何人和氏有其愆彈冠俟知己知己誰
不然良田無晚歲膏澤多豐年亮懷與璠美積
久德逾宣親交義在敦申章復何言

贈丁儀

曹子建

初秋涼氣發庭樹微銷落凝霜依玉除清風飄
飛閣朝雲不歸山霖雨成川澤黍稷委疇隴農
夫安所獲在貴多忘賤爲恩誰能博狐白足禦
冬焉念無衣客思慕延陵子寶劍非所惜子其
寧爾心親交義不薄

贈王粲

曹子建

端坐苦愁思攬衣起西游樹木發春華清池激
長流中有孤鴛鴦哀鳴求匹儔我願執此鳥惜
執無輕舟欲歸忘故道顧望但懷愁悲風鳴我
側義和逝不留重陰潤萬物何懼澤不周誰令
君多念自使懷百憂

又贈丁儀王粲

曹子建

從軍度函谷驅馬過西京山岑高無極涇渭揚
濁清壯哉帝王居住麗殊百城負闕出浮雲承

露槩泰清皇佐揚天惠四海無交兵權家雖愛
勝全國爲令名君子在末位不能歌德聲丁生
怨在朝王子歡自營歡怨非貞則中和誠可經

贈白馬王彪

曹子建

謁帝承明廬逝將歸舊疆清晨發皇邑日夕過
首陽伊落廣且深欲濟川無梁汎舟越洪濤怨
彼東路長顧瞻戀城闕引領情內傷 其一 大谷
何寥廓山樹鬱蒼蒼霖雨泥我塗流潦浩縱橫
中逵絕無軌改轍登高岡脩坂造雲日我馬玄

以黃

其二

玄黃猶能進我思鬱以紆鬱紆將難

進親愛在離居本圖相與偕中更不克俱鴟梟
鳴衡杞豺狼當路衢蒼蠅間白黑讒巧令親踈
欲還絕無蹊攬轡止踟蹰 其三 踟蹰亦何留相
思無終極秋風發微涼寒蟬鳴我側原野何蕭
條白日忽西匿歸鳥赴喬林翩翩厲羽翼孤獸
走索羣銜草不遑食感物傷我懷撫心長太息
其四 太息將何爲天命與我違奈何忽同生一
往形不歸孤魂翔故城靈柩寄京師存者忽復

過亡沒身自衰人生處一世去若朝露晞年在
桑榆間影響不能追自顧非金石咄嗟令心悲
其五 心悲動我神棄置莫復陳丈夫志四海萬
里猶比隣恩愛苟不虧在遠分日親何必同衾
疇然後展殷勤憂思成疾疠無乃兒女仁倉卒
骨肉情能不懷苦辛 其六 苦辛何慮思天命信
可疑虛無求列仙松子久吾欺變故在須臾百
年誰能持離別未無會執手將何時王其愛玉
體俱享黃髮期收淚即長路援筆從此辭 其七

贈丁翼

曹子建

嘉賓墳城闕豐膳出中厨吾與二三子曲宴此
城隅秦箏發西氣齊瑟揚東謳肴來不虛歸觴
至反無餘我豈狎異人朋友與我俱大國多良
材譬海出明珠君子義休侍小人德無儲積善
有餘慶榮枯立可須滔蕩固大節時俗多所拘
君子通大道無願爲世儒

贈秀才入軍五首

嵇叔夜

良馬旣閑麗服有暉左攬繁弱右接忘歸風馳

電逝躡景追飛凌厲中原顧盼生姿攜我好仇
載我輕車南凌長阜北厲清渠仰落驚鴻俯引
淵魚盤于游田其樂只且

輕車迅邁息彼長林春木載榮布葉垂陰習習
谷風吹我素琴咬咬黃鳥顧疇美音感悟馳情
思我所欽心之憂矣未嘯長吟

浩浩洪流帶我邦畿萋萋綠林奮榮揚暉魚龍
澆漦山鳥羣飛駕言出遊日夕忘歸思我良朋
如渴如飢願言不獲愴矣其悲

息徒蘭圃秣馬華山流磻平臯垂綸長川日送
歸鴻手揮五絃俯仰自得游心太玄嘉彼釣叟
得魚忘筌邦人逝矣誰與盡言

閑夜肅清朗月照軒微風動桂組帳高褰旨酒
盈樽莫與交歡鳴琴在御誰與鼓彈仰慕同趣
其馨若蘭佳人不在能不來歎

贈山濤

司馬紹統

若若倚桐樹寄生於南岳上凌青雲霓下臨千
仞谷處身孤且危於何託余足昔也植朝陽傾

枝俟鸞鷲今者絕世用倥偬見迫東班匠不我
顧牙曠不我錄焉得成琴瑟何由揚妙曲冉冉
三光馳逝者一何速中夜不能寐撫劔起躑躅
感彼孔聖歎哀此年命促下和潛幽冥誰能證
奇璞冀願神龍來揚光以見燭

荅何劭二首

張茂先

吏道何其迫窘然坐自拘纓綬爲微繆文憲焉
可踰恬曠苦不足煩促每有餘良朋貽新詩示
我以游娛穆如灑清風煥若春華敷自昔同寮

乘於今比園盧衰疾近屏殆庶幾並懸輿散髮
重陰下抱杖臨清渠屬耳聽鸞鳴流日翫儵魚
從容養餘日取樂於桑榆

洪鈞陶萬類大塊稟羣生明闇信異姿靜躁亦
殊形自予及有識志不在功名虛恬竊所好文
學少所經忝荷既過任白日已西傾道長苦智
短青重困才輕周任有遺規其言明且清負乘
爲我戒夕惕坐自驚是用感嘉貺寫心出中誠
發篇雖溫麗無乃違其情

贈張華

何敬祖

四時更代謝懸象迭卷舒暮春忽復來和風與
節俱俯臨清泉涌仰觀嘉木敷周旋我陋圃西
瞻廣武廬既貴不忘儉處有能存無鎮俗在簡
約樹塞馬足摹在昔同班司今者並園墟私願
偕黃髮逍遙綜琴書舉爵茂陰下攜手共躊躕
奚用遺形骸忘筌在得魚

贈馮文饗遷斤丘令

陸士衡

於皇聖世時文惟晉受命自天奄有黎獻闡闡

既闢承華再建明明在上有集惟彥其一弈弈
馮生哲問迓迪天保定子靡德不鏠邁心玄曠
矯志崇邈遵彼承華其容灼灼其二嗟我人斯

戢翼江潭有命集止翻飛自南出自幽谷及爾
同林雙情交映遺物識心其三人亦有言交道
實難有頰者弃千載一彈今我與子曠世齊歡
利斷金石氣惠秋蘭其四羣黎未綏帝用勤止

我求明德肆于百里僉曰爾諧俾民是紀乃眷
北徂對揚帝祉其五疇昔之游好合纏緜借曰

未給亦既三年居陪華幄出從朱輪方輿齊鑣
比迹同塵其六之子既命四牡項領遵塗遠蹈
騰軌高騁慶雲扶質清風承景嗟我懷人其邁
惟求其七否泰有殊窮達有違及子春華後爾
秋暉逝將去我陟彼朔陲非子之念心孰為悲
其八

荅賈長淵

并序

陸士衡

余昔為太子洗馬魯公賈長淵以散騎常侍侍
一東宮積年余出補吳王郎中令元康六年入

為尚書郎魯公贈詩一篇作此詩荅之云爾

伊昔有皇肇濟黎蒸先天創物景命是膺降及
羣后迭毀迭興邈矣終古崇替有徵其一在漢

之季皇綱幅裂火辰匿暉金虎曜質雄臣馳騫
義夫赴節釋位揮戈言謀王室其二王室之亂

靡邦不泯如彼墜景曾不可振乃眷三哲俾乂
斯民啓士雖難改物承天其三爰茲有魏即宮

天邑吳實龍飛劉亦岳立干戈載揚俎豆載戢
民勞師與國玩凱入其四天厭霸德黃祚告釁

獄訟遠魏謳歌適晉陳留歸藩我皇登禪庸岷

稽顙三江改獻其五赫矣隆晉奄宅率土對揚

天人有秩斯祐惟公太宰光翼二祖誕育洪胄

纂戎于魯其六東朝既建淑問我我我求明德

濟同以和魯公戾止袞服委蛇思媚皇儲高步

承華其七昔我逮茲時惟下僚及予棲遲同林

異條年殊志比服舛義稠游跨三春情固二秋

其八祇承皇命出納無違往踐藩朝來步紫薇

升降秘閣我服載暉孰云匪懼仰肅明威其九

分索則易攜手實難念昔良游茲焉未歎公之

云感貽此音翰蔚彼高藻如玉如蘭其十惟漢

有木曾不踰境惟南有金萬邦作誅民之胥好

狂狷厲聖儀形在蓄予聞子命其十一

其十二陸士衡

牽世嬰時網駕言遠徂征飲餞豈異族親戚弟

與兄婉變居人思紆鬱游子情明發遺安寐寤

言涕交纓分塗長林側揮袂萬始亭佇眇要遐

景傾耳玩餘聲南歸息未安北邁頓承明未安

有昨軌承明子弃予俯仰悲林薄慷慨含辛楚
懷往歡絕端悼來憂成緒感別慘舒翮思歸樂
導渚

贈尚書郎顧彥先二首 陸士衡

大火貞朱光積陽熙自南望舒離金虎屏翳吐
重陰淒風近時序苦雨遂成霖朝游忘輕羽夕
息憶重衾感物百憂生纏絲自想尋與子隔蕭
牆蕭墻阻且深形影曠不接所託聲與音音聲
日夜濶何用慰吾心

朝游游曾城夕息旋直廬迅雷中霄激驚電光
夜舒玄雲拖朱閣振風薄綺䟽豐注溢脩雷潢
潦浸階除停陰結不解通衢化為渠沉稼湮梁
潁流民泝荆徐眷言懷桑梓無乃將為魚

贈顧交趾公貞 陸士衡

顧侯體明德清風肅已邁發迹翼藩后改授撫
南裔伐鼓五嶺表揚旌萬里外遠績不辭小立
德不在大高山安足凌巨海猶縈帶惆悵瞻飛
駕引領望歸旆

贈從兄車騎

陸士衡

孤獸思故藪離鳥悲舊林翩翩游宦子辛苦誰
爲心髣髴谷水陽婉孌岷山陰營魄懷茲土精
爽若飛沉寤寐靡安豫願言思所欽感彼歸塗
艱使我怨慕深安得忘歸草言樹背與襟斯言
豈虛作思鳥有悲音

答張士然

陸士衡

繫身躋秘閣秘閣峻且玄終朝理文案薄暮不
遑眠駕言巡明祀致敬在祈年逍遙春王園躑

躑千畝田廻渠繞曲陌通波扶直阡嘉穀垂重
穎芳樹發華顛余固水鄉士惣轡臨清淵戚戚
多遠念行行遂成篇

爲顧彥先贈婦二首

陸士衡

辭家遠行游悠悠三千里京洛多風塵素衣化
爲緇脩身悼憂苦感念同懷子隆思亂心曲沉
歡滯不起歡沉難剋興心亂誰爲理願假歸鴻
翼翻飛游江汜

東南有思婦長歎充幽闥借問歎何爲佳人眇

天末游宦久不歸山川脩且闊形影參商乖音
息曠不達離合非有常譬彼弦與箏願保金石
軀慰妾長饑渴

贈馮文羆

陸士衡

昔與二三子游息承華南拊翼同枝條翻飛各
翼尋苟無凌風翮徘徊守故林慷慨誰為感願
言懷所欽發軫清洛汭驅馬大河陰佇立望朔
塗悠悠迥且深分索古所悲志士多苦心悲情
臨川結苦言隨風吟愧無雜佩贈良訊代兼金

夫子茂遠猷款誠寄惠音

贈弟士龍

陸士衡

行矣怨路長怒焉傷別促指途悲有餘臨觴歡
不足我若西流水子為東跼岳慷慨逝言感徘
徊居情育安得攜手俱契闊成駢服

為賈謐作贈陸機

潘安仁

肇自初創二儀烟煴粵有生民伏羲始君結繩
闡化八象成文芒芒九有區域以分其一神農
更王軒轅承紀畫野離疆爰封衆子夏殷既襲

宗周繼祀絲絲瓜瓞六國互峙其二疆秦兼并

吞滅四隅子嬰而視漢祖膺圖靈獻微弱在涅

則渝三雄鼎足孫啟南吳其二南吳伊何僭號

稱王大晉統天仁風遊揚僞孫銜璧奉土歸疆

婉婉長離凌江而翔其四長離云誰咨爾陸生

鶴鳴九臯猶載厥聲况廼海隅播名上京爰應

旌招撫翼宰庭其五儲皇之選實簡惟良英英

朱鸞來自南岡曜藻崇正玄冕丹裳如彼蘭蕙

載採其芳其六藩岳作鎮輔我京室旋反桑梓

帝弟作弼或云國宦清塗攸失吾子洗然恬淡

自逸其七廊廟惟清俊又是延擢應嘉舉自國

而遷齊轡羣龍光讚納言優游省闈珥筆華軒

其八昔余與子繾綣東朝雖禮以賓情同友僚

嬉娛絲竹撫鞞舞韶脩日朗月攜手逍遙其九

自成離羣二周于今雖簡其面分著情深子其

超矣實慰我心發言爲詩俟望好音其十欲崇

其高必重其層立德之柄莫匪安恒在其十一南稱甘

度北則橙崇子鋒頓不頽不崩其十一

贈陸機出為吳王郎中令

潘正叔

東南之美曩惟廷州顯允陸生於今妙儔振鱗
南海濯翼清流婆娑翰林容與墳丘其一玉以
瑜潤隋以光融乃漸上京羽儀儲宮玩爾清藻
味爾芳風沫之彌廣挹之彌冲其二崑山何有
有瑤有珉及爾同僚具惟近臣予涉素秋子登
青春愧無老成厠彼日新其三祁祁大邦惟桑
惟梓穆穆伊人南國之紀帝曰爾諧惟王卿士

俯俸從命奚恤奚喜

其四

我車旣巾我馬旣秣

星陳夙駕載脂載轄婉孌二宮徘徊殿闈醪澄
莫饗孰慰饑渴其五昔子忝私貽我蕙蘭今子

徂東何以贈旃寸晷惟寶豈無璵璠彼美陸生
可與晤言其六

贈何陽

潘正叔

處生化單父子竒泣東阿桐鄉建遺烈武城播
絃歌逸驥騰夷路潛龍濯洪波弱冠步鼎鉉旣
立宰三河流聲馥秋蘭摘藻豔春華徒美天姿

茂豈謂人爵多

贈侍御史王元貺

潘正叔

崑山積瓊玉廣厦構衆材游鱗萃靈沼撫翼布
大階膏蘭孰為消濟治由賢能王侯厭崇禮廻
迹清憲臺雙屈固小往龍翔翹大來恊心毗聖
世畢力讚康哉

文選卷第二十四終

音釋

咄丁咄子侍作灑土灑助桂音儵直頰丘怒音
鮮作處作密

